

Rapport dal cussegl pastoral per la radunonza da pleiv dils 16 da matg 2024

Preziai tuts presents,



Alla davosa radunonza da pleiv essan 5 da nus, numnadamein Alice Cajacob, Daniela Wieland, Maya Deplazes, Fabian Bearth ed jeu vegni reelegi. Rosmarie Maissen ei vegnida elegida igl onn 2022. Sin la foto maunca nies collega Fabian.

Nus vein lu survegniu l'incumbensa da seconstituir da niev. Quei vein nus fatg a caschun da nossa sentupada dils 31 d'uost ed essan secunvegna da schar ils posts sco tochen dacheu. Quei vul dir, Alice resta vinavon actuara ed jeu menadra dil cussegl pastoral per quella perioda da 3 onns.

Sco cussegl pastoral dalla pleiv sespruein nus da sustener sur Saji leu nua ch'el giavischa, da purtar ideas per tgirar nossa cuminonza da pleiv e da mantener buns contacts cun las uniuns per collaboraziuns pusseivlas.

Cuortamein numnel las occurrenzas, nua che nus essan stai dalla partida.



Ils 10 d'uost ein ministrantas e ministrants stai envidai dalla pleiv tier ina sentupada. 15 affons ein stai presents. 13 da quels ein vegni naven da Rabius tochen Surrein cun velo, ensemen cun sur Saji, il Fabian e la calustra Manuela.

En baselgia ha sur Saji dau l'entschatta cun in pèr plaids d'engraziament. Silsuenter ein tuts returnai ad Igniu tier ina grillada che la Giuliana veva organisau e per passentar temps ensemen.



Sin giavisch da sur Saji vein nus organisau spontanamein in pelegrinadi a Ziteil la dumengia, ils 20 d'uost. 19 persunas ein stadas dalla partida. Suenter l'ascensiun a Ziteil, tgi a pei cun empau suadetsch e tgi cun velo, ha sur Saji celebrau ina sontga messa. Silsuenter havein nus astgau guder in bien gentar, dar ina paterlada avon che puspei prender la via sutta peis. Engiuvians ei tut iu pli tgunsch.



Las devoziuns da famiglia che nus vein instradau gl'atun 2022 anflan buna accoglientscha. Gabriela Cabalzar astga colaborar da niev cun Simona Cathomas e Carmen Bearth. In grond engraziament ad ellas per lur bi engaschi.

Las devoziuns han giu liug suandontamein:

ils 10 da settember 23 a Surrein cul tema "engraziament per la raccolta"

ils 19 da november a Cumpadials cul tema "la glisch d'advent"

ils 10 da mars a S. Benedetg cul tema "cureisma"

Ussa suondan aunc duas devoziuns el 2024, e quei

ils 8 da settember en Val cul tema "aia" ed

ils 1 da december a Reits cul tema "S. Clau"



Ils 1 d'october ha la grupp da Rabiis organisau ina sentupada campestra a Runs per l'entira pleiv. Suent in bi survetsch divin ha ei dau la pusseivladad da guder ina buna pulenta cun ina ligiongia dal grill ni ina buccada caschiel. Secapescha che las pettas han era buca muncau. Muort la bellezi'aura ein bunamein 70 personas stadas presentas, quei che ha legrau zun fetg ils organisaturs.

Ils 23 da november havein nus envidau senioras e seniors ad in survetsch divin cun uncziun dil s. Jeli a Surrein. Silsuent han las uniuns da dunnas dalla vischnaunca purschiu a tuts in bien refrestg en casa da scola. Quella bial'acziun da cuminonza ha fatg bia plascher a tuts.



La dumengia dils 10 da december ha sur Saji festivau ina messa da rorate per l'entira pleiv a Surrein. Gia la damaun marvegl dalla 7 ei ina biala grupp serimnada ella baselgia illuminada mo da candeilas che nies caluster Marcel veva preparau cun gronda premura. Suent quella atmosfera magica dil survetsch divin ein parochianas e parochians stai envidai ad in solver en casa da scola. Tenor nies meini han tuts presents gudiu quella sentupada speciala d'advent.

Ils 15 da december ha lu aunc igl usitau rorate cun solver per las scolass giu liug a Rabiis.



A sur Saji schai la lectura dalla bibla fetg a cor. Perquei ha el iniziav il 26 da schaner 2024 in viadi atras la bibla. Bunamein 20 personas prendan part e sur Saji sesprova d'introducir nus cun grond engaschi ella vasta biblioteca dalla bibla.

Nus segidein cun sur Saji tier l'organisaziun.

Gievia proxima, il 23 suonda gia la quarta sentupada.



Duront il temps da cureisma havein nus organisau las dumengias da suppa, quei ils 25 da fevver a Rabiis, ils 3 da mars a Surrein ed ils 10 da mars a Sumvitg. Il bi recav da 4'700 francs havein nus surdau al fondo social dall'uniun da dunnas cantunala dil Grischun. En mintga vitg ein persunas voluntarias segidadas cun nus. Da tut cor engraziein nus per quei grond sustegn. Insumma astgein nus adina spluntar tier l'in u l'auter sche nus duvrein agid tier las occasiuns els singuls vitgs. Quei schazegiein nus fetg ed admettein a tuts e tuttas in cordial Dieus paghi.

Forsa haveis vus fatg stem che dus bials sulegls mellens pendan a Sumvitg vid la plonta nua che las cruschs da defunctas e defuncts vegnan tschentadas. Nus numnein quellas plontas ellas baselgias "plontas dalla veta". Tier la veta s'auda bu mo la mort, mobein era la naschientscha. Perquei decorein nus la plonta cun in sulegl mintgamai cu in affon nescha en in da nos vitgs.

Bugen menziuneschel aunc il viadi da pleiv che stat avon porta. La mesjamna, ils 5 da zercladur meina quel nus a Weesen ella claustra Maria Zuflucht. Leu muossa sora Magdalena (oriunda da Medel) la producziun da hostias e raquenta da siu mintgadi. Silsunter mein cul bastiment a Quinten, in vitget che segir biars da nus enconuschan aunc bu.

Cun quels plaids sun alla fin cun miu rapport. Nus engraziein a tuttas e tuts che separticipeschan alla veta da pleiv. Quei dat mintgamai anim e plascher dad anflar novas vias per enrihir nossa cuminonza. Per cass che zatgi ha ina buna idea per ulteriuras activitads, essan nus adina aviarts. Mo da cuminonza savein nus crescer. Jeu engraziel da cor per la biala collaboraziun enteifer il cussegl pastoral, a sur Saji per siu engaschi e bien sustegn ed alla supraponza per sia gronda lavur.

Engraziel fetg per voss'attenziun!